

M100: Graf Rudolf

- 1,1 “[...][...] cronen .
1,2 tragen also wir sulen gan
1,3 wr unse sele selbe stan”
1,4 Der bote d’ uur schone
1,5 zv dem pabes da zu rome
1,6 deme gab er die briue
1,7 de ware- ime enbore libe
1,8 also er sie rechte ane sach
1,9 vil iemerliche daz er sprach
1,10 “Pat’ de celis
1,11 miserere nobis”
1,12 der pabes boten sante
1,13 witene after deme lande
1,14 zu den armen vn- den richen
1,15 allen gelichen
1,16 daz sie zv rome quemen
1,17 unde sine wort virnemen
1,18 do sie dare waren gecumen
1,19 do saget er in als er z vernvmen
1,20 hate an den briuen
1,21 her sprach mine vil lieben
1,22 ich biete vch an der svnne-
1,23 durch die heiligen himelwnne
1,24 daz ir wollet ledegen daz grap
1,25 da got selbe inne lach
1,26 die z wol getun mugen
1,27 vnde ouch ze vehtene tugen
1,28 alle geliche
1,29 arme vn riche
1,30 daz sie ane rue
1,31 daz himelriche buen
- 2,1 da ze hove was .
2,2 d’ greve bi ime saz .
2,3 vnde manic iungeli-c gemeit .
2,4 des greuen sun was da gereit .
2,5 d’ vil biderue rudolf .
2,6 al daz lut was ime holt

- 2,7 daz in mit ougen ie gesach .
2,8 vil mi-nicliche er do sprach
2,9 zv den boten “sit willekume .
2,10 sal ich v ichtesicht vrumen
2,11 hir in mines vater lant .
2,12 bedurfet er ros oder gewant
2,13 oder phennige
2,14 daz laz ich v gewi-nen .”
2,15 d’ bote da vil schone
2,16 bat ime got lone .
2,17 durch sines selbes gute .
2,18 daz er in sine hute .
2,19 den juncheren neme .
2,20 wand er ime wol inzeme
2,21 Der bote d’ sprach schone .
2,22 “dir inbutit da von rome .
2,23 der pabes sine hulde”
2,24 do gap er ime ze stunde .
2,25 einen brief in die hant
2,26 do erhup sich michel gedranc .
2,27 do tet er in einen [...] [...]
2,28 [...] [...] d[...]chen[...]
2,29 als er den brief ane sach
- 3,1 “woldes du sagen .
3,2 die starken nuwe- mere
3,3 wi g’ne ich die vorneme”
3,4 Der bote antwerte ime do .
3,5 “ich liez da manigen vnfro .
3,6 do ich nehest schit danne- .
3,7 d’ cristene- was geuange-
3,8 also vnmaze vil irslage- .
3,9 daz v nieman ne kan gesage- .
3,10 vmme die not die man in tud .”
3,11 do wart deme iunchere- gut .
3,12 viel leide an sinem mute .
3,13 er sprach “here durch dine gute .
3,14 hilf mir wider minen vater .
3,15 daz er wolle mir gestaten
3,16 daz ich dir da mvze dienen .
3,17 durch diner muter liebe .
3,18 here himelische got .
3,19 nv verhenge nicht daz sinen spot
3,20 der tuuel mit den sinen habe .
3,21 sente marien ich iz clage .
3,22 d’ himelischen kuniginne- .
3,23 daz sie in genedic wolle sin .”
3,24 weinend er daz wort sprach

- 3,25 so daz iz nieman ne sach .
3,26 die trahene ime vielen ze tale
3,27 d' bote nam sin eine ware
- 4,1 [...] [...] wol beraten
4,2 mit guten vmbehangen-
4,3 ein bette stunt da bevangen .
4,4 mit wizen lachen vil breit
4,5 ein deckelachen was da bereit
4,6 daz da obene vffe lach
4,7 daz schein des nachtes als ez were tach
4,8 von dem edelin gesteine
4,9 groz vn- cleine
4,10 daz dar allenthalben ane stunt
4,11 daz was reine vn- gut
4,12 als ez von rechte solde
4,13 wan iz die greuinnen also wolde
4,14 da vore na ein teppet lach
4,15 da die vrouwe vf trat
4,16 da sie vf solde sizzen
4,17 daz was mit guten wizzen
4,18 harte wol gemachet
4,19 da bi was geschaffet
4,20 ein ander teppet geleget .
4,21 also man in manigen enden phligit
4,22 da die vrouwe- vffe sazen
4,23 die schufen vn- mazen
4,24 phellil vn- cindal
4,25 vnde ouch and' gewat
4,26 des man da ze houe bedorfte
4,27 da sazen vnde worchten
4,28 schone megede vn- wip
4,29 suckenie unde kursit
- 5,1 [...] [...] kerten
5,2 wir vingen einen gefertin
5,3 d' vurte an siner hant .
5,4 ein schone ros . sin hat daz lant
5,5 ere da iz inne stat
5,6 "habe danc menlicher dat
5,7 macht er genesen" "nein er nicht
5,8 ich han behalden den diep
5,9 wa hie enbore verre bi"
5,10 "beware daz iz nicht zv nahe si"
5,11 Do schufen die helede
5,12 ir nachtselede
5,13 d' ruwe was in harte not .
5,14 do sie solden ezen daz brot

- 5,15 do sliefen sie in den stunden .
5,16 vn- hate- ez in dem munde
5,17 alda beliben sie dri tage
5,18 als ich han gehort sagen .
5,19 do die waren irgangen .
5,20 do huben sie sich da-ne-
5,21 zu ierusalem vur die stat
5,22 also d' greue rudolf bat
5,23 Do inphienc man die here-
5,24 mit michelen eren .
5,25 arme vn- riche
5,26 alle geliche .
5,27 mit grozeme gelute .
5,28 heilictum vn- crvce
5,29 mit manicheme harte
- 6,1 Dar nach an dem vunften tage
6,2 qua- ein bote d' begonde sage
6,3 von scalun nvwe mere
6,4 daz d' kvni-c dar vffe were
6,5 "waz weist u" "ich was ta .
6,6 d' selben burch also na .
6,7 daz ich sach in daz lant .
6,8 so uerre hate ich mich vorrant"
6,9 Deme kunige sagete man die rede
6,10 "wir suln ein nvwez irhebe .
6,11 vffe die gotis gnadin"
6,12 sprach d' iunge greue .
6,13 "herre mir retet min sin
6,14 iedoch ich allertumbest bin
6,15 dar zv trostet mich min mvt .
6,16 ob iz vch alle dunket gut .
6,17 daz wir schafen vnse schare .
6,18 wir suln dare vroliche vare .
6,19 vn- in besizzen in d' stat .
6,20 got durch sin heilige grap .
6,21 helfe vns daz wir in gelezzen .
6,22 vn- wir in irgezzen .
6,23 daz er vns leides hat getan .
6,24 er mvz vns me d' gisele lan"
6,25 Des sagete ime d' kunic danc .
6,26 "ir sit kvmen in daz lant
6,27 herre durch gotis ere .
6,28 zv irwegene uwer sele .
6,29 ir habet degentlichen mut
6,30 her greue svaz vch dunket gut .
6,31 daz wil ich mit v ane gan .
6,32 die wile daz ich daz leben han ."

7,1 da-nen vber eine wochen .
7,2 wart ein tac gesprochen .
7,3 do iz qua- in daz teidinc .
7,4 da was gereit manic jungelinc .
7,5 die wisen mit den tv-me- .
7,6 zv den selben stunden .
7,7 huben sie sich an die vart
7,8 da manic man irslagen wart .
7,9 Der greue mit den sine-
7,10 begonde vur yle .
7,11 mit ime manic ritter stolz
7,12 die legeten sich nider in daz holz .
7,13 der selben burch also na
7,14 daz nieman ne mochte ga .
7,15 noch geriten er abe
7,16 sie ne wurden sin geware
7,17 Der kunic reit in daz lant
7,18 er stifte roup vn- brant
7,19 vaste an die heidenschaft .
7,20 er was des vil wol bedacht
7,21 daz er ime schaden wolde
7,22 als er von rechte solde
7,23 er hete ime alsame getan .
7,24 do muste al in ouwe gan
7,25 beide wip vn- kinder .
7,26 die sluc man alse rinder
7,27 er herete in daz lant
7,28 do qua- balde gerant .
7,29 ein bote vn- sagete mere
7,30 daz die cristinen weren
7,31 cumen in me lande
7,32 die roubeten vn- branden
7,33 daz sagete man deme kunige
7,34 daz geuiel ime harte vbele
7,35 do er z rougen gesach
7,36 zornicliche daz er sprach
7,37 zv eime knechte vn- hiez in ge
7,38 zv deme edelen man girabobe
7,39 d' was ein wise iunger man
7,40 er ne wolde nvwet ane gan
7,41 er ne het es sine- rat
7,42 wend er ime zv herlicher tat .
7,43 dike riet mit gute- wizen
7,44 durch daz solde er sizzen
7,45 vffe d' eren banke
7,46 nv sult ir alle danken .
7,47 den herren die des gerne phlegen

7,48 daz sie svlhe ratgeben
7,49 nemen zv irme rate
7,50 die sich vru vn- spate
7,51 z aller zit des besten vlizen
7,52 den man nie mochte verwize-
7,53 vntruwe vn- tracheit
7,54 vn- ire herren wisen von d' boseit

8,1 So laze mich got leben .
8,2 susgetaner ratgeben .
8,3 ist luzel i- me lande
8,4 sie ne raden e die schande .
8,5 dan sie tvn die ere .
8,6 si ne solden ire lere
8,7 nimmer geuolgen .
8,8 we . den bin ich harte irbolgen
8,9 Do sprach d' helet girabobe .
8,10 "diz ne geschah vns nie me
8,11 nv wir z aber haben vornvme- .
8,12 vn- iz also si nv kvmen .
8,13 nv svld ir boten senden
8,14 in allen den enden .
8,15 da ir die helfe mvget han
8,16 wir suln sie vroliche bestan .
8,17 oder ich vorliese den lip .
8,18 ez ist also gut inzit .
8,19 also wie langer biten .
8,20 wir mvzen doch mit in striten ."
8,21 Do d' helt so gemeit .
8,22 geschuf daz d' bote reit .
8,23 do mvsten sie alle vffe die were .
8,24 do qua- daz michele here .
8,25 mit grozer craft vur die stat .
8,26 also d' greue rudolf bat .
8,27 sie waren alle wol gare .
8,28 zvhant huben sie sich dare .
8,29 mit sineme vane- vur daz tore .
8,30 girabobe d' stunt da vore .
8,31 mit drin sinen gesellen
8,32 die wil ich v nenne- .
8,33 d' eine hiez gaiol . gruwin .
8,34 d' ander agarrain .
8,35 den driten nante man agar .
8,36 man wurd is dicke wol gewar .
8,37 daz sie gute heledere waren .
8,38 daz sage ich v z vare
8,39 Do irhup sich ein gestrite .
8,40 do sluge- wunde- wite .

8,41 die ellenden recken .
8,42 mit den scharfen ecken .
8,43 ouch name- sie michelen schaden .
8,44 deme greue- beleip . da irslagen
8,45 dru hundert siner ma-ne
8,46 d' strit d' werete lange .
8,47 da vore lagen sie daz ist war .
8,48 me da-ne ein halp iar .
8,49 daz sie se nicht mochte- gewine
8,50 do schiden sie sich mit vnmi-nen .
8,51 die burchere von d' veste .
8,52 die liefen an die geste
8,53 eines nachtes vnder daz here
8,54 e dan sie queme- zv were .
8,55 do taten sie in michelen schaden
8,56 deme greue- wart sin volc irslagen .
8,57 daz is luzel genas
8,58 alzv vunderst er was .
8,59 harte dicke an d' not .

9,1 doch sluch er gaiol gruwine- dot
9,2 sine sellen wrden geuange-
9,3 vn- dar nach vil schire irhangen .
9,4 daz hiez d' greue tun vor die stat
9,5 harte dicke man in bat .
9,6 daz er s nicht tvn ne wolde
9,7 mit silber vn- mit golde .
9,8 wolde man ime die herre- wegen
9,9 durch daz er sie lieze leben .
9,10 "Des het ich immer schande
9,11 ich han von mime lande .
9,12 mit mir here bracht so vil .
9,13 daz ich des vnbere- wil .
9,14 sie haben vns grozen schaden getan
9,15 wollet ir die lant laze- stan .
9,16 vn- rvmen die gote ze eren
9,17 so wil ich v die herre-
9,18 beide lebende wider geben"
9,19 do sprach girabobe d' degen
9,20 "daz ne wirdet nimmer getan
9,21 al die wile daz ich daz leben han
9,22 vn- sichein svert mac geregen
9,23 so svl wir aber ein nvwiz eben
9,24 ab is got geruchet
9,25 so vindit ir daz ir svchit"
9,26 "Nv lat v . nicht sin so gach
9,27 wir han v- virgolden nach
9,28 svaz so ir vns ze borge hat getan

- 9,29 daz wil ich an die herren lan
9,30 die in den herbergen ligent irslagen
9,31 ich wene sie da heime nicht en sagen
9,32 daz sie zv scalun ha-t gesehen
9,33 daz ma-c ouch v . vil wol geschen .
9,34 waz ob i z nicht en tut
9,35 ich sal noch maniges heiden mvt
9,36 betruben er ich werde irslagen .
9,37 ich wil v werliche sagen
9,38 er ich scheide hinnen”
9,39 doch hatten sie von den zinne- .
9,40 daz volc so garuwe verlorn
9,41 daz sie die wip hatten geschorn
9,42 vn- hiezen die ane tun ma-nes wat .
9,43 dit was girabobes rat .
9,44 vf d’ burch here
9,45 ne was nicht ma-ne mere
9,46 da-ne wip aleine
9,47 die andern hetten gemeine .
9,48 de- lip vorlorn von d’ c’stene- diet .
9,49 die ne liezen ir genesen niet .
9,50 Girabobe d’ biderue
9,51 sprach er nidere
9,52 von d’ burch vnd’ daz here
- 10,1 “her greue nv sehet wie wir vnse were
10,2 von prise wol haben bewart
10,3 nvo ne- wirt he niman me gespart
10,4 diese iungen recken .
10,5 sie lant die scharfen ecken .
10,6 wiert in die state getan .
10,7 sie svln so vreisliche slan .
10,8 daz man mit eren mac schouwen .
10,9 vn- ouch reden vor den vrowe- .”
10,10 do d’ kvnic wart ininnen
10,11 daz sie an den zinne- .
10,12 des volkes hatten also vil .
10,13 sine- mvt ich v sagen wil .
10,14 ein wort sprach er vberal .
10,15 “ich hore michelen schal .
10,16 vffe d’ burch ich ne weiz vn- waz daz ist
10,17 ich wene nv ist anticrist .
10,18 den heiden kvmen zv helfe .
10,19 sie varen so mit gelfe .
10,20 wider den sul wir vechten .
10,21 ich gelob ez vnseme trechtin .
10,22 vn- wa mochte- sie genvmen . han .
10,23 also manigen schone- iungen man .

10,24 so laze mich got leben .
10,25 die des tores solden phlegen .
10,26 die hant vil vbele gehut .
10,27 mir ne senfte noch min mvt .
10,28 so wil ich sie laze virliesen
10,29 an deme galgen suln sie kiesien .
10,30 den vil bitteren tot .”
10,31 sime hergreue- er do gebot .
10,32 daz er sie ime alle vinge .
10,33 vn- vil redeliche- hinge .
10,34 Die greue wolde dannen gan .
10,35 mit zuchtin bat . in da bestan .
10,36 girabobe d’ gute .
10,37 d’ stetichgemvte .
10,38 mit grozen listen er do sprach
10,39 “her greue wir liden vngemach
10,40 ir hat vns grozen schaden getan .
10,41 daz selbe ne hat vch nicht vorgan
10,42 nv neme wir des einen vride
10,43 waz danne al se ich geniden .
10,44 dar vmme von der starken diet .
10,45 di ne wiezzen vmme arbeite niet .
10,46 iz ist ein volch also getan .
10,47 si ne achten nicht vffe man .
10,48 vn- ist ein rechte wilde diet
10,49 vn- ne ruchen vmme z leben niet .
10,50 vn- sizzen an des meres ende .
10,51 vn- heizent volcsvende .”
10,52 Der greue antwerte ime do .
10,53 vn- wart vil innecliche- vro .
10,54 vil gezogentliche daz er sprach .
10,55 “ich ne weiz ob ich ez geschaffen mach .
10,56 dise rede sag ich deme kvnige .

11,1 geuellet sie ime wol oder vbele .
11,2 daz laze ich dir schiere sagen .
11,3 er dan ez morne beginne tage- .”
11,4 Der greue zu deme kvnige ginc .
11,5 vil minnecliche er in enphinc .
11,6 unde vragete in ware er were
11,7 ob er icht wiste mere .
11,8 do sprach er “ia . daz salt u mir sagen”
11,9 “ich was gegang an den graben
11,10 den wold ich baz besehen
11,11 nv ist ze sagene mir geschen
11,12 girabobe der gute
11,13 d’ stete gemvte .
11,14 eines vrides g’t er an mich .

11,15 des sal ich von ime biten dich”
11,16 “ist daz war .” “ia iz is .
11,17 du salt es an mir sin gewis
11,18 daz ich dir andirs nicht ne sage .
11,19 wan als ich vornumen habe”
11,20 Do sante er nach sinen . holden .
11,21 die ime da raten solden
11,22 do sie zvsamene quame- .
11,23 vn- des greuen wort vornamen .
11,24 do wurden sie innecliche vro .
11,25 deme kvnige rieten sie do .
11,26 daz er vride gebe .
11,27 vn- ouch von ime neme
11,28 do bat er den greuen
11,29 daz er den vride neme
11,30 vn- andern sine- vursten
11,31 die da wole torsten
11,32 raten vmme vechte
11,33 ob man ime brechte .
11,34 daz man mit nide
11,35 nine keme zu wige
11,36 alda wart d’ vride gegeben
11,37 doch hete manic man daz leben
11,38 virlorn in beiden siten
11,39 d’ kvnic bat riten
11,40 sine lute wider ze lande
11,41 mit eren ane schande
11,42 Do sie quamen zv ierlm
11,43 der patriarche von bethlehem
11,44 mit manigime cardinale
11,45 sie gereiten sich ze male
11,46 mit michelem vlize
11,47 manichen vanen wizen
11,48 beide brvn unde goltrot
11,49 d’ pat’arche do gebot .
11,50 groze- vn- cleine- .
11,51 allen gemeine-
11,52 daz sie svngen gote ze eren .
11,53 vn- enphingen die herren .
11,54 do sie enphangen waren .
11,55 zvhant sie ir opher gaben .
11,56 deme himelschen gote
11,57 do quam des kvniges bote
11,58 zv deme greuen do san
11,59 vn- hiez in zv sime herren gan .
11,60 er sprach “dv mvst biten .
11,61 iz ist zv verre ich wil dare riten”
11,62 er hiez ime brengen ein raut

11,63 d' gelief alse ob die werlt wit .
11,64 al sin eigen were .
11,65 dar vf saz d' helet mere
11,66 unde reit vur den palas .
11,67 dar d' kvnic vffe was

12,1 Do enphinc man den herren
12,2 mit michelen eren
12,3 vn- wisete en zu der kemenatin
12,4 da d' kvnic zv rate
12,5 saz mit sinen man-en
12,6 do qua- d' helet gegangen .
12,7 d' helet stolz vn- gemeit
12,8 al vntat was ime leit
12,9 des minneten en die vrowen
12,10 sva sie en mochte- schouwen
12,11 des wart ime vil getougen
12,12 manic blic von den ougen
12,13 sine gute luchten alse ein glas
12,14 wan er ir aller spigel was
12,15 Vor den kvnic er do ginc
12,16 vil min-ecliche er in enphinc
12,17 er bat in bi ime sizzen .
12,18 er wiste vil groze wizze
12,19 an deme kindesche- helede
12,20 sin gelaz was da vremede
12,21 zv ierlm im me lande
12,22 dicke er an ime des bekante
12,23 daz er zv rechte housch were
12,24 mit guteme gebere
12,25 was er wider arme vn- riche
12,26 alle geliche
12,27 Der kvnic sprach da ze stunt
12,28 "rudolf dir ist wole kunt
12,29 vmme den keiser von rome
12,30 sve-ne er trage die crone
12,31 so hat er hogezite
12,32 sin gesidele daz ist wite
12,33 an dem velde vf geslagen
12,34 die ime daz svert vur tragen
12,35 daz sin edele vurstē
12,36 man saget ioch svne in durste .
12,37 so schenke ime ein riche kvnic
12,38 d' is kreftic vn- vrumic
12,39 der trage von ime die crone
12,40 so dienet man da schone
12,41 den arme- unde den richen
12,42 harte herlichen

12,43 Daz sin tvgentliche dinc
12,44 dise mere sagete ein jungelinc
12,45 so mich ir nie vordroz
12,46 nv bin ich doch sin genoz
12,47 vn- han lande genuc .
12,48 si-t immer mer hat min mut
12,49 also wan here gestan
12,50 ob ich hete einen man
12,51 die mir daz konde gemachen”
12,52 do begonde d’ greue lachen
12,53 vn- duchte en harte gemelich
12,54 er sprach “vnderwindes tu is dich
12,55 daz geruwet dich harte sere
12,56 edele kvnic here
12,57 vn- were din schade harte groz
12,58 wande keisers genoz
12,59 ne wart noch nie nechein geborn
12,60 din lant were allez virlorn
12,61 doch gebe ich dir gute- rat

13,1 so sin hus tegeliches stat
13,2 mochtet tu daz ircrigen
13,3 so la sine hogezit beliben .
13,4 dannoch hetes tu michel ere
13,5 daz nie nechein kvnic mere .
13,6 so groze gewan .”
13,7 den kunic des sere wunder nam .
13,8 Daz houbet er do nider sluc
13,9 also der man tvt .
13,10 d’ vil sere denket .
13,11 er wurd es gecrenket
13,12 ob er ez nicht volbrechte .
13,13 doch was sin gedechte .
13,14 daz er iz volbringen wolde .
13,15 er wiste wol daz er solde
13,16 werben nach den eren
13,17 daz konde in wol geleren .
13,18 d’ greue da von arraz
13,19 die aller tugende meist’ was .
13,20 do bevalch d’ kunic here
13,21 sin lant unde sine ere
13,22 deme greuen vffe sine truwe .
13,23 er bat daz er virnvwe
13,24 wolde z er werlt sinen pris .
13,25 “du bist volkvmen unde wis
13,26 aller vrumickeite .
13,27 du salt mir bereite .
13,28 daz dienest durch minen willen .

13,29 des gedanke ich dir mit minnen”
13,30 Der greue tet als er in bat .
13,31 do gebot er an der stat
13,32 den vogeden vn- den schultheize-
13,33 daz mit ageleize .
13,34 ir ieclich gewnne als er solde
13,35 svaz so er ichtes wolde .
13,36 sie taten alle als er sie hiez .
13,37 ir nichein des nicht ne liez
13,38 wande sie in alle vorchten .
13,39 einen vullemunt er do worchte
13,40 den eren in so kvrze- tagen .
13,41 daz man dar immer mach abe sagen
13,42 Daz gesidele hiez er mache- wit .
13,43 weder e no sit
13,44 also richez nie ne wart .
13,45 ich wene da nicht ne wart gespart
13,46 weder daz silber noch daz golt rot .
13,47 in alle die lant man gebot
13,48 sver verneme die mere .
13,49 daz d’ dare queme .
13,50 d’ wurde wol enphangen
13,51 ein heiden was dar gegangen
13,52 von sime lande ermeliche
13,53 unde was doch ein herre riche .
13,54 vurlorn het er sine- sun
13,55 umbe den was er vz comen .
13,56 den ne mocht er nirgen vinden

14,1 do ne wold er nicht irwinden
14,2 er ne besehe daz gesidele
14,3 swenne er widere
14,4 queme daz er mochte gesagen
14,5 die hokezit was irhaben
14,6 Des greuen wizze waren gut
14,7 nu hete d’ kvnic sinen mvt
14,8 gelazen an den iungelinc
14,9 Appollinart daz schone kint .
14,10 bevalch her deme herren
14,11 daz er iz solde leren
14,12 die zucht von sime lande .
14,13 wande man an ime bekande
14,14 daz er zv rechte houicsh were .
14,15 sinen site vil lobebere
14,16 sold er in ane bringen .
14,17 den schaft schiezen vn- springen
14,18 gevuge behurdiren mit deme schilde
14,19 ze rechte wesen milde

14,20 vn- wizzen weme er solde vursagen
 14,21 “dit sal er vil verre haben .
 14,22 truwe vn- otmuticheit .
 14,23 da mite gewinnet er selde vn- groze richeit .”
 14,24 Daz kint spilete vn- was fro
 14,25 daz bevalch d’ greue do
 14,26 bonifaite sime neven
 14,27 “durch minen willen salt v phlegen
 14,28 wisen zu der hovischeit .
 14,29 vn- leide ime die dorpericheit
 14,30 gevuge behurdieren .
 14,31 daz salt v ime lieben .
 14,32 daz er sich ouch decke mit me schilde .
 14,33 dar zv wesen milde
 14,34 zv stete bringen sinen mvt
 14,35 daz ist ime an den eren gut
 14,36 zu den vrouwen sal er gerne gan
 14,37 gezogentliche vor in stan
 14,38 unde ouch bi in sizzen
 14,39 z allen dingen sal er wizze
 14,40 han nach sime rechte
 14,41 sva er gute knechte
 14,42 horet reden von manheit
 14,43 daz ne sal ime nicht wesen leit
 14,44 daz sal er horen gerne
 14,45 da bi mach er lerne
 14,46 daz ime zv en eren wole stat”
 14,47 dit was des edelen greuen rat
 14,48 Dirre michele schal
 14,49 quam verre vberal
 14,50 in der heidene lant
 14,51 waren boten uz gesant
 14,52 die sprachen als i solden
 14,53 sver dar kvmen wolde
 14,54 der wurde wol inphange-
 14,55 von wibe vn- von ma-ne-

15,1 [...] al der genoz
 15,2 die ie man hiezen
 15,3 sine tugende in nicht en liezen .
 15,4 tun nicheine dorpericheit
 15,5 michel was sin edelicheit .
 15,6 er was harte biderwe
 15,7 der kvnic wisete daz gegensidele .
 15,8 eime herre- deme iz wole inzam .
 15,9 von flandirn was d’ edele man
 15,10 des kvniges svn bi ime saz .
 15,11 luzzel man ichtes da virgaz

15,12 daz d' hogezit in zam .
15,13 daz schufe allez d' edele man
15,14 Man diene te vollicliche .
15,15 deme heren kvnige riche
15,16 als man von rechte solde .
15,17 sves da ieman wolde
15,18 des gap man ime genvch .
15,19 wilt vn- zam man da vure truch
15,20 er kund iz wol bedenken
15,21 vmme daz vure . gen d' schenken
15,22 die den tranc trugen .
15,23 daz sie mit geuvge .
15,24 allen vollicliche gaben .
15,25 die zv r hogezit quamen .
15,26 do sie vroliche sazen .
15,27 vn- trunken vn- azen .
15,28 die heiden do deme herren
15,29 santen . mit eren .
15,30 gabe harte vrede

16,1 [...] [...] also in bonifait bat
16,2 behalten er iz sime neuen solde
16,3 bi dem britel er iz nicht ne wolde
16,4 als er doch ze iungest tete
16,5 danne-vart da zu stete .
16,6 engegen den herbergen wart
16,7 des greuen knappe apollinart
16,8 d' wart es verre geware
16,9 er gienc ilende dare
16,10 vn- furt iz faris in sin behalt
16,11 daz gereite was ein rot golt
16,12 daz vf dem faris lach
16,13 unde was luter also die tach
16,14 von dem edelen gesteine
16,15 groz unde cleine
16,16 die nacht ne wart nie so tunkel
16,17 der karvunkel
16,18 d' ne luchte genvch
16,19 daz gesmide daz iz truch
16,20 daz was vil lobesam
16,21 deme greuen iz vil wol in zam
16,22 daz d' stegereif leder solden sin
16,23 da waren bant sidin
16,24 geworcht zv einem borten
16,25 gewieret zu den orten
16,26 mit dem edelen gesteine
16,27 die schellen cleine .
16,28 die waren golt alle rot

- 16,29 also der [...] [...]
- 17,1 “daz wir icht mugen gesagen .
17,2 alles des wir gedagen
17,3 so wesit i z abe ich en sage v nicht
17,4 nein also ich u bin lieb
17,5 so saget mir vweren muot
17,6 ia ob ir mir daz gerne tuot
17,7 an aller slachte valscheit”
17,8 des was die vrowe im unbereit
17,9 daz sie sagete iren muot san
17,10 svie vbele sie z e hete gelan
17,11 Der greue hup vf vn- sprach .
17,12 siner vrowen er do jach
17,13 war v-me er wart so rot
17,14 “vrowe harte groze not
17,15 lid ich umme vwere mi-ne
17,16 alle mine sinne
17,17 han ich an vch gelazen
17,18 ich mi-ne vch ane maze
17,19 daz ich dar abe was na tot
17,20 vwer mi-ne tut mir groze not”
17,21 do sprach die vrowe riche
17,22 wider in gezogentliche
17,23 “rudolf du bist mir harte lieb
17,24 daz ne mach ich verhelen nicht
17,25 ouch tvinget mich die mi-ne
17,26 ich ne wolde dich ininnen
17,27 d’ liebe nicht bri-gen .”
17,28 “wol muze vns gelingen”
17,29 sprach d’ greue gute
17,30 ime wart liebe ze muote
17,31 do bat d’ helt wise
17,32 die maget beat’sen .
17,33 daz sie schiere wolde senden
17,34 in des houis ende
17,35 nach Bonifaite sime neuen .
17,36 ich wene d’ milde kuone degen
17,37 die schone- vrowe- kuste
17,38 beide sie is wol geluste
17,39 daz gesach beat’sen
17,40 die housche vn- die wise
17,41 die sprach in ireme mute
17,42 “dise zuei si-t sunder hute
17,43 ich wil gan in die phorten stan
17,44 daz sie iren willen han”
17,45 Do d’ greue vernam
17,46 daz da nieman ne quam

- 17,47 unde d' torewarte
17,48 stunt in d' warte
17,49 vn- sie die state heten
17,50 waz wenit ir daz sie teten
17,51 sie spileten mit einander
17,52 daz en ist nichein wandel
17,53 wande gerne si en gewerte
17,54 alles des er gerte
17,55 sie tet alles ane sinne
- 18,1 der was sie ane von mi-ne-
18,2 do daz spil was irgan .
18,3 die vrowe gab ime ane wan .
18,4 ein harte gut vingerlin .
18,5 daz stiez sie an die hant . sin .
18,6 vn- er gab ire ein ander
18,7 sus einander wandel .
18,8 taten sie beide .
18,9 mit vroude- ane leide .
18,10 nu laze wir die rede stan .
18,11 wir suln an den kunic van .
18,12 der einen boten sante .
18,13 von deme cristene- lante .
18,14 halap deme kunige riche .
18,15 er inbot ime mi-necliche .
18,16 dienst unde minne viele .
18,17 er hiez in biten daz er ime .
18,18 den greuen wolde sende- .
18,19 mit gebunden henden .
18,20 "ob tu mich mit truwe- wilt meine- .
18,21 so salt u ime bescheine-
18,22 unde manen in dirre bete ."
18,23 d' bote gap da zu stete .
18,24 den brief deme kunige in die hant .
18,25 die gienc an eine want
18,26 den selben . brief man do las .
18,27 daz dar an geschriben was .
18,28 do stunt an dem brieve .
18,29 "vruntschaft vn- alle liebe .
18,30 mi-ne vn- rechte steticheit
18,31 ze ware iz sal dir wesen leit .
18,32 rudolfes vntruwe
18,33 in minem dienst laz . dich ruwen .
18,34 den h'zogen unde minen suon
18,35 die er mir beide hat benvmen ."
18,36 Halap der kunic riche
18,37 d' sprach vrumecliche .
18,38 "mir ist din bete vil unliep

18,39 des greue- ne sende ich ime niet
18,40 hat ime der greue icht getan .
18,41 vn- will er s wider mich tach han
18,42 unde iz bringen zv teidinge .
18,43 zu gnaden vn- zu gedinge
18,44 ob icht von rechte .
18,45 wil ieman vf en vechte .
18,46 des roubes sal er entreden sich .
18,47 werliche des verphlege ich mich
18,48 wie mocht ich daz verwinde- .
18,49 daz ich en nu solde binden
18,50 vn- in dar sente als eine- hu-t .
18,51 so solde man mich an der stu-t
18,52 lesterliche . uahe- .
18,53 vf eine- boum hahen

19,1 mir wider gesenden .
19,2 mit gesundeme libe .
19,3 nv wis des ane zviuel .
19,4 gewere degen biderue .
19,5 gesent dich got widere .
19,6 mit guote ich dich irgezze .
19,7 d' angestlichen lezze ."
19,8 Do sprach d' ellender degen .
19,9 "bonifaiten mine- neuen .
19,10 beuel ich an uwer truwe .
19,11 lat vch an ime ruwe .
19,12 svaz ir an mir hat getan .
19,13 daz lazet ime zv staten stan
19,14 herre vn- weset ime guot .
19,15 ob ime zv lande sin muot .
19,16 her na beginne stan .
19,17 so suld ir in geniezen lan .
19,18 ob ich v ie dienst getete ."
19,19 do entfienc d' kunic da ze stete .
19,20 vf sine truwe daz kindelin .
19,21 daz bevalch er d' tochter sin .
19,22 er gebot ime daz er were .
19,23 ir heimelich kemerere .
19,24 Vrlop nam d' greue .
19,25 d' milde degen geneme .
19,26 zv deme ingesinde
19,27 do ne wold er nicht irwinde .
19,28 er ne queme zu deme here .
19,29 daz vor d' burch an dem mere .
19,30 lach mit vil grozer craft
19,31 einer liste hat er gedacht .
19,32 er na- zvene boume

19,33 nv nimet dirre rede goume
19,34 die bant er an sine bintrieme- .
19,35 durch daz in ne zige . nieman .
19,36 er ne horte zu me here .
19,37 do er also na dem mere .
19,38 qua- daz in duochte .
19,39 daz er entriten mochte .
19,40 die boume liez er vallen .
19,41 daz ez here begonde schallen .
19,42 des rant er in daz mere
19,43 daz irsahen die vffe d' were .
19,44 daz er des kuniges bote was .
19,45 die hulfen ime daz er genas .
19,46 in die schif sie sazen .
19,47 d' ruder sie nicht virgazen .
19,48 do quame- sie ime zu helfe .
19,49 si-t waren mit gelfe .
19,50 die b'gere vo- me troste
19,51 von grozer angest sie irloste .
19,52 d' greue mit siner manheit
19,53 grozer eren half in sin degenheit
19,54 Halap d' kunic riche
19,55 d' gebot wisliche .
19,56 groze samenu-ge .
19,57 alden vn- ju-gen .
19,58 vru-t vn- magen .
19,59 die ime willich waren
19,60 daz sie ime zv helfe quemen .

20,1 er wolde den genemen
20,2 ledigen als er solde
20,3 sine burch er gerne wolde
20,4 mit grozer craft intsezzen
20,5 den kunic wold er lezzen
20,6 gerne siner widervart
20,7 da wart ein strit vil hart
20,8 zvischen den heren beiden
20,9 vf einer grune- heide
20,10 da die here zusamene riden
20,11 sie heten vngerne virmiden
20,12 sie ne liezen blasen die trumme-
20,13 da sie nach den eren drungen
20,14 beidenthalben im me strite
20,15 do begonde er nider rite
20,16 d' ie warp nach den eren
20,17 die edelen b'gere
20,18 volgeten ime harte gerne
20,19 den greuen irsach verne

20,20 gilot d' kunic riche
20,21 do qua- virwenentliche
20,22 d' greue mit einer luzilen schare
20,23 die waren aber so wol gare
20,24 vn- hatten manliche- muot
20,25 wizzet ir wie d' valke tud
20,26 deme got hat bescheret
20,27 da er den lip mite generet
20,28 daz mvz er al irringen
20,29 sven er wirdet ininne-
20,30 voge le ein michel volc
20,31 daz herze ist ime so stolz
20,32 daz er dar hine kumet geulogen
20,33 nv virnemet mir i n han v nicht gelogen
20,34 die zvfuret er so
20,35 alle werdent sie vnvro
20,36 wande er tud in grozen schaden
20,37 einen vehet er in abe
20,38 oder zuene durch sine geileit
20,39 nv va wir wider an die manheit
20,40 die d' edele herre tete
20,41 do sprancte da zv stete
20,42 d' greue mit den sine-
20,43 do liez er wol schinen
20,44 daz er ein war helt was
20,45 vir war sagen ich v daz .
20,46 er vur vnder sie als ein valke
20,47 er begonde sie also walke .
20,48 ouch half ime daz faris
20,49 daz sie ime alle den pris
20,50 gaben mit rechte
20,51 ir ne gesahet nie so vechte
20,52 in nicheineme strite so herte
20,53 mit vlacheme sverte
20,54 sluch er vf die cristenheit
20,55 ime was iedoch ir angest leit
20,56 durch not muste entwige-
20,57 gilot d' kunic riche
20,58 er ne mochte nicht si da-ne- kuome- .
20,59 girobabe hatte in so uuor genvome-

21,1 d' juncherre nicht ne liez
21,2 des in d' kvnic tuon hiez .
21,3 do lief her harte drate
21,4 zu d' vrowe- ke-menatin
21,5 do vant her den jungelinc
21,6 bonifaiten daz schone kint
21,7 vor d' ke-menatin stan

21,8 alzhant sprach d' bote san
21,9 "min herre wolde dine vrowen sehen."
21,10 "nv- warte wa-ne daz mvge geschen
21,11 min vrowe die ist vf gestan
21,12 her mach wol zv ir gan
21,13 sie sehet in gerne vn- iz ist ir lieb."
21,14 die bote d' ne svmete nicht
21,15 her saget ez wider als er solde.
21,16 d' kvnic do gerne wolde
21,17 die schonen kunigi-ne- sehen
21,18 d' vil manich leit was geschen
21,19 Do qua- d' kvnic riche
21,20 harte virwenentliche
21,21 gegangen zv d' kvnigin
21,22 willecuome hiez her sie sin
21,23 gezogentliche sie in virsvchte
21,24 sie vragete ob her geruchte
21,25 nider bi sie sizzen
21,26 sie sprach mit guten wizen
21,27 svoze wort mit rechter mazen
21,28 sie wisete ime die straze
21,29 da her doch erste inne reit
21,30 her virlos sine arbeit
21,31 des ne darf man ire wizen nicht
21,32 wende ire manich herzelip
21,33 von deme was geschen des sie da beut
21,34 manige not sie mit ime irleit
21,35 daz sie doch vil wol virwant
21,36 wider den kunic sprach sie alzhant
21,37 "herre ir sult schaffen
21,38 mit bischofen vn- mit phaffe-
21,39 daz ir mich lazet toufen"
21,40 do gebot die vrowe coufen
21,41 aller hande . spise harte vile
21,42 dar zv gebot sie daz man ire
21,43 nach den armen wolde senden .
21,44 in daz lant in allen enden .
21,45 sva man d' sicheinen vunde
21,46 daz man ire die gewu-ne
21,47 den wolde sie ir almvsen geben
21,48 daz tet sie alliz durch den degen
21,49 ob her irgen lebende were .
21,50 daz in ire got wider gebe
21,51 Der kunic tet d' vrowen bete
21,52 her gebot alda zv stete .
21,53 bischove- vn- phaffen
21,54 die toufe gereite machen
21,55 zirliche schone .

21,56 in dem te-plo vrone
21,57 da man sie toufen solde
21,58 d' kunic daz schaffen wolde

22,1 dit getruoch sich zv einer hogezit .
22,2 daz man daz allerbeste wip
22,3 cristen machen wolde .
22,4 die ire paten werden solden .
22,5 daz waren zveine kvnige .
22,6 dri herzogen vrvomege .
22,7 bischofe vn- greuen .
22,8 die ire den name- gaben .
22,9 in d' toufe "irmengart ."
22,10 groz ere ire da geboten wart
22,11 die vrowe ir almvsin da gap
22,12 zv constinopele in der stat .
22,13 vlizliche sver ir quam .
22,14 alse man die gift von ir na-
22,15 do bat die vrowe guote .
22,16 mit inneclichem mvote
22,17 vnsen herren got . daz her sie gewerte .
22,18 ob d' arme greue lebete
22,19 daz her ir den wider sente .
22,20 vn- daz her ir svere ein ende
22,21 gnedicliche wolde geben .
22,22 grozen angest leit sie v-me den degen .
22,23 Sie gap phe-ninge vn- gewant .
22,24 do sagete man vber al daz lant .
22,25 da were ein vrowe riche .
22,26 die gebe keiserliche .
22,27 almvosin vor ir svonde
22,28 daz begonde man wite kvonde
22,29 verre in manic lant .
22,30 zv einer seligen vrowen wart sie bekant
22,31 sie buzte manigeme sine not
22,32 d' greue die da solde tot
22,33 sin des her nicht en was .
22,34 von auentuor her genas
22,35 d' da liget in me hvs .
22,36 cuome want her sich dar vz
22,37 mit d' knechte menteln beide .
22,38 die machete her zv eineme seile
22,39 da mite her vff ez hus steich .
22,40 vil dicke her in v-macht wider seich .
22,41 sere hatte her gefallen .
22,42 nv svle wir danken alle .
22,43 vnseme herren gote daz her ie genas .
22,44 guot vrvome was iz daz d' helt lebende was .

22,45 Der greue crouch zv d' ture .
22,46 niman ne vant her da vure .
22,47 die stegin her nidir liez .
22,48 gote von himele her dicke gehiez
22,49 groz wandel vor sine missetat .
22,50 bvzen an d' stat die . bi deme wege stat
22,51 eine- dornbusch alda crouch her in .
22,52 daz duchte . in ein harte gut gewin .
22,53 daz her [...] [...]

23,1 [...] [...] her al den tach
23,2 ime was manich vnsenfter slach
23,3 gegeben vn- manic stoz
23,4 tiefe wunden harte groz
23,5 der hatte her da viele gewonnen
23,6 do quam in den stunden
23,7 als ich ioch die nacht schiet
23,8 vil dicke her vnsen herren ane rief .
23,9 daz her ime den lip generte
23,10 wol her in des gewerte
23,11 Do quam ein guot abbet geriten
23,12 ein iuncherre reit da mite
23,13 d' vuorte brot in siner hant
23,14 ich will es ime v-ber sage- danc
23,15 iedoch er s nicht ne mochte
23,16 sit ez ime nicht ne tochte
23,17 do warf er z in die straze nider
23,18 daz wart deme armen greuen sider
23,19 do ime die dinsternisse quam
23,20 vn- her zv crigene began
23,21 d' wolgeborne vuorste
23,22 her was na tod von duorste
23,23 det tou den her in me grase vant
23,24 mit siner linden wizen hant
23,25 des nam her alda zv stuont
23,26 harte luozzel in den mv-t
23,27 iedoch half ime daz
23,28 daz her zv d' zit genas
23,29 gnadin were ime not
23,30 do vant her ein halp brot
23,31 daz man da heizet gastel
23,32 iz ist alv-me sinvwel
23,33 daz ienre warf vzer hant
23,34 deme ich da hvte sagete danc
23,35 daz nam d' ellende
23,36 sver ime daz missewende
23,37 wil haben d' tvot vnrechte
23,38 iz ist manigeme guoten knechte

- 23,39 dicke missecuomen
23,40 [...] [...]
23,41 also was ime geschen
23,42 des wil ich an vch alle iehen
23,43 ein luzzel er des brotes az
23,44 do crouch her aber vuorebaz
23,45 vber eine walsche mile
23,46 vil we was sime libe
23,47 svenne ime die nacht virgienc
23,48 vn- ime die tach ane vienc
23,49 so mvste die wolgeborne
23,50 sich heben zv eime dorne
23,51 etuwa zv einer hecke
23,52 ia was ime die rucke
23,53 vn- die buch so geslagen
23,54 daz ez v niman kan gesagen
23,55 daz her den lip ie behielt
23,56 groz gelucke des gewielt
23,57 Do crouch d' arme herre
23,58 von d' stat enbore verre
23,59 e dan in die vmmacht ane gienc
23,60 vn- iz zv tagende vienc
- 24,1 do ne mochte her nicht crigen mere .
24,2 do qua- ein wellere
24,3 al die straze her gegan
24,4 do her in gesach do begonde her stan .
24,5 iedoch her nar zv ime gienc .
24,6 mit der hant her in vf gevienc .
24,7 her wande daz her were tot .
24,8 d' helet leit vil groze not .
24,9 doch ensup her an d' wete .
24,10 die her ane hete .
24,11 daz her ein edele herre was
24,12 den wellere irbarmete daz .
24,13 daz her so iemerliche lach .
24,14 nider warf her sinen stap .
24,15 daz houbet na- her in sinen schoz .
24,16 sin clage die wart harte groz
24,17 Der gute wellere .
24,18 von deme ich hute dise mere .
24,19 sagete d' hatte mit ime getragen
24,20 win als ich hore sagen
24,21 vn- ein nephelin . da her vz dranc
24,22 ich wil es ime vmber sage- danc .
24,23 des wines gap her ime da zv stunt .
24,24 deme greue- ein luzzel in den mvnt
24,25 daz her zu ime selben qua- .

24,26 also her den man ober ime vernam .
 24,27 do vorchte in d' helt mere
 24,28 vzer mazen sere .
 24,29 her wande endicliche wesen tod
 24,30 doch virna- her wole daz sine not .
 24,31 d' wellere clagete .
 24,32 got her dicke manete
 24,33 innecliche siner hantgetat .
 24,34 daz her ime craft vn- rat
 24,35 durch sine vunft wunden wolde geben .
 24,36 des vrowete sich d' kvone degen
 24,37 deme guten wellere .
 24,38 was sin gemvorte sere
 24,39 vmbe den ellenden degen .
 24,40 her wande daz her sin leben
 24,41 alda lazen solde .
 24,42 gerne her ime helfen wolde .
 24,43 her ne konde noch ne mochte
 24,44 vil dicke her z virsuchte .
 24,45 alda mvst er in lazen
 24,46 do gienc sine straze .
 24,47 d' wellere gute .
 24,48 mit trvrigen mvorte .
 24,49 Der arme stolze kuone degen .
 24,50 d' dachte wider an daz leben
 24,51 wande in des beduchte .
 24,52 daz her wol genesen mochte
 24,53 des wart her i-necliche vro .
 24,54 vof richte her sich do .
 24,55 do crouch d' ellende .
 24,56 mit vuzen vn- mit henden .
 24,57 zv eime dorne d' was . dicke .
 24,58 da wart ime in me rucke .

25,1 "wolde des got geruchen ."
 25,2 sprach bonifait d' guote
 25,3 mit vroliche mvorte .
 25,4 "wilich ros sal ich v bringen"
 25,5 "mochtes tv mir gewi-ne- .
 25,6 bontharden den wold ich riten
 25,7 ich ne mach noch nicht gestriten .
 25,8 deme guten farise .
 25,9 bonifait du salt lise
 25,10 zv miner lieben vrowen gen .
 25,11 vn- vrage sie ob ich sie mvze sehen"
 25,12 Bonifait des nicht . ne liez .
 25,13 des in sin neue tvn hiez .
 25,14 zv siner vrowen her do gienc .

- 25,15 zvhant her an die rede vienc
 25,16 “vrowe ein dinc sal ich v sagen .
 25,17 woldet ir iz duldecliche trage-
 25,18 daz v . vil lieb were .”
 25,19 “ich han gute mere
 25,20 leider selten hie virnvme- .
 25,21 wolde got were vns min herre cuome- .”
 25,22 “ich sprach den boten die von ime quam”
 25,23 also die vrowe daz virnam
 25,24 do gewan sie ein vro gemvte .
 25,25 die kunigi-ne- guote
 25,26 begonde vor liebe weinen .
 25,27 da mvoste sie bescheine-
 25,28 die guten wipliche site
 25,29 wan alle tvogent die ist da mite .
 25,30 von den guten siet- wil ich v sagen .
 25,31 nichein bese wip mach sie gehabt
 25,32 sie ist in svar zv tragende .
 25,33 sie inherend er wol zv habene .
 25,34 Do sprach die kvniginne- .
 25,35 “bonifait suze mi-ne .
 25,36 we-ne sal ich dinen neuen sehen .”
 25,37 “sve-ne got wil so mach daz wole geschen .
 25,38 ne sit d’ rede nicht zv vro .
 25,39 vn- tvinget vwer gemvte so .
 25,40 daz nieman ne werde ininne- .
 25,41 noch hinacht wil ich in v bringen .”
 25,42 die vrowe tet also her sie bat .
 25,43 bonifait reit wider in die stat .
 25,44 bontharden brachte her sime neuen .
 25,45 dar vof saz d’ cuone degen .
 25,46 vn- reit banechen an daz velt .
 25,47 ia gienc virwenentliche inzelt .
 25,48 bonthart rechte alsame ein tier .
 25,49 ia was virwenet vn- fier .
 25,50 d’ helt die dar voffe saz .
 25,51 siner note her vile alda virgaz
 25,52 Bonthart d’ was vreuele .
 25,53 ouch vugete sich harte ebene .
 25,54 d’ greue in sin gereite .
 25,55 sin stolze mvot gap ime geleite .
 25,56 zv cuomende zv d’ kunigin .

 26,1a da sie in
 26,1b hiez willecuome sin .
 26,2 dit was des abendes spate .
 26,3 do sich daz lvt allez hate .
 26,4 gelegit . die mane schone schein

26,5 die zvei wurden des in ein .
26,6 daz sie zv d' kvnigi-ne- giengen
26,7 virholne sie iz ane viengen .
26,8 daz nieman wart i-inne- .
26,9 die schone kvniginne- .
26,10 intfienc mit vrolichem mvote
26,11 den edelen greue- guoten .
26,12 sie tvanc in zv iren bruste-
26,13 lipliche sie in cuoste
26,14 sie nam in vnder iren mantel
26,15 do begonde sie gote danken .
26,16 daz her ire in wider hatte gegeben
26,17 ouch intfienc wole den degen .
26,18 beatrix die gute .
26,19 die housche vn- die wolgemvot .
26,20 alsame taten sie beide
26,21 do virgaze- sie grozer leide .
26,22 Ein bette was da bereitet
26,23 mit phellele wol bebreitet .
26,24 da sie voffe ligen solden .
26,25 sie beide gerne wolden
26,26 daz die nacht drier iare were lanc .
26,27 dicke sagete sie gote danc
26,28 des her wider sie hete getan .
26,29 do begonden sie zv bette gan
26,30 des ne darf nieman vragen
26,31 ob sie icht liepliche insamet lagen
26,32 ia sie werliche .
26,33 daz groze kunicriche
26,34 ne-men sie nicht vuor eine nacht
26,35 sin tvogent hatte sie da zvo bracht
26,36 vn- ire vil reine wipheit
26,37 daz sie in hatte liep ane leit
26,38 lipliche sie in vmbevienc
26,39 die nacht in alzu schiere irgienc
26,40 daz was in innecliche leit
26,41 bonifait d' iungelinc gemeit
26,42 gienc zu r ke-menatin
26,43 mit beat'sen wart her zu rate
26,44 daz her sie wecken wolde
26,45 beatrix sprach her ne solde .
26,46 ir dannoch nicht wecken
26,47 "lazet den edelen recken .
26,48 ligen vn- sin gemach han
26,49 ia is die nacht iezu irgan
26,50 vn- cuomet schone d' tach .
26,51 sua man den schaden mach
26,52 bewaren daz ist guot getan .

26,53 we bonifait nv la stan
26,54 ich genieze miner sinne
26,55 daz ich in wole hir inne
26,56 behalde al vober diesen tach”
26,57 beatrix in so viele bat .
26,58 daz her tet al ire bete
26,59 vn- gienc wider da zv stete .
26,60 da bleip d’ greue inne .
26,61 mit d’ kvnigi-nen .
26,62 her wolde gerne wider heim
26,63 mit d’ kunigi-ne- wart her des in ein
26,64 daz sie sich dar nach schufen .

27,1 beatrixen hiez sie do svchen .
27,2 daz edele gesteine .
27,3 groz vn- cleine
27,4 daz sie von lande brachten .
27,5 vil liebe sie ire do gedachten .
27,6 goldes hatten sie die macht
27,7 des vuorten sie mit in die craft
27,8 allez sie daz vazzen hiez .
27,9 bonifait des nicht ne liez .
27,10 her ne gewu-nne soumere
27,11 starke wande sie svere
27,12 tragen solden vober lant .
27,13 zv constinopele her die vant
27,14 die coufte her als er solde .
27,15 in d’ nacht sie do wolden
27,16 sich heben alse sie taten .
27,17 von d’ ke-menatin .
27,18 daz golt sie zvsamene trugen .
27,19 die soumere sie do luden .
27,20 mit deme edelen gesteine .
27,21 ir here daz was cleine .
27,22 danne- huben sie sich do
27,23 des was die kvnigi-nen vro .
27,24 Bonifait vorne reit .
27,25 der selbe iungeli-c gemeit
27,26 vurte einen soumere .
27,27 d’ truch harte svere
27,28 von deme edelen gesteine .
27,29 beat’sie die reine .
27,30 die wol gelobete vber al daz lant
27,31 vuorte einen soumere an d’ hant .
27,32 miechel was ir arbeit
27,33 dar na die kvnigi-ne-n reit
27,34 mit deme stolzen wigande
27,35 do wolden sie heim zv lande .

27,36 sie riten in kvrzer wile .
27,37 des waldes manige mile
27,38 die nacht vber vn- al den tach
27,39 viele ich v dar abe sagen mach
27,40 iemerlicher dinge
27,41 die schone kvnigi-ne-
27,42 wolde gerne ruowen .
27,43 do irsach sie bluomen .
27,44 in schoneme grase stan
27,45 zv deme greuen sprach sie do san
27,46 “ich bin mvde ich ne mach nicht me
27,47 mir ist worden harte we
27,48 ich wolde g’ne rvowen .
27,49 dort in ienen bluomen .”
27,50 deme greuen was leit ir vngemach
27,51 zv bonifaite her do sprach .
27,52 “min vrowe ist mvode si ne mach nicht me .
27,53 dort sten bluomen vn- cle .
27,54 da salt u hine keren .”
27,55 alda begonde sich meren .
27,56 ir vnvroude vn- ir groz herzeleit .
27,57 bonifait d’ iungelinc gemeit .
27,58 karte rechte ingegen d’ stat .
27,59 alse in die greue sin neue bat .
27,60 Nider sie do sazen
27,61 sie trunken vn- azen .
27,62 sie hatten harte guoten win .
27,63 irmengart die kvnigin
27,64 wane [...] [...]

28,1 vil wol sie des gedachten .
28,2 daz sie vil mvode was
28,3 schone bluomen vn- gras .
28,4 leiten sie d’ vrowen vnder
28,5 ich mach v sagen wunder
28,6 von liebe vnde ouch von herzeleide .
28,7 bonifait solde aleine
28,8 des selben nachtes wachen
28,9 ein vur begonde her machen
28,10 die ros hatte her gebunden
28,11 do quamen in den stunden .
28,12 zvelf schechere gerant
28,13 die wolden daz guot mit gewalt .
28,14 nemen werliche .
28,15 sie wanden wesen riche
28,16 Bonifait daz gri-me werte .
28,17 vunfe her so virserete
28,18 zv tode mit d’ ecken .

28,19 dannoch ne wolde her nicht wecken
28,20 den edelen greuen sinen neuen .
28,21 die siebene namen ime daz leben
28,22 iedoch werthe her sich gnvoch .
28,23 daz svert her also vaste sluoch
28,24 daz iz von deme slage irlanc .
28,25 d' greue des in me slafe vof spranc
28,26 bonifait lach dar nidere .
28,27 d' stolze greue biderue
28,28 vant sinen neuen tot .
28,29 do alreist gienc iz an die not
28,30 vnder sie lief her als ein degem .
28,31 alda wold er sinen neuen .
28,32 harte gerne han virloren
28,33 gri-meclich groz was sin zorn
28,34 daz tet her harte wole schin
28,35 her gienc houwende vnder in
28,36 als ein wuotender man
28,37 do sluoch her svaz her ane quam .
28,38 von me libe her sie alle brachte .
28,39 vil leide her ime gedachte .
28,40 vmbe bonifaits lip .
28,41 "daz ich ie in dieser bosen zit
28,42 ou we leider wart geborn
28,43 herre daz ich dinen zorn .
28,44 alsus vngenedicliche han .
28,45 wie sal ich nv ane van
28,46 mine dinc in dirre heide ."
28,47 do was ime harte leide
28,48 Ober bonifaits her do gienc
28,49 vil mi-necliche her in vmbevienc
28,50 sin houbet na- her i- sine- schoz
28,51 sin clage die was harte groz
28,52 sere weinende her do sprach .
28,53 "herre min groz vngemach .
28,54 daz ich vil dicke irliden han
28,55 daz wand ich daz iz nv were irgan ."
28,56 d' greue begonde weinen .
28,57 alda mvste . her bescheinen
28,58 die herzeliche leide vmbe sine- neuen
28,59 her sprach "liebe trut mvstes tu nv geleben
28,60 so hette ich virwunden al mine not
28,61 o we bitterliche tot
28,62 daz du an mich nicht ne queme
28,63 do dv bonifaits neme
28,64 den tuweren vn- den gute-
28,65 den senften gemvte-"